

Akilaraaruserinermik ingerlatsineq pillugu Inatsisartut inatsisaata allangortinneqarneranut Inatsisartut inatsisissaatut siunnersuut

(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)

Saqqummiussissut**Siullermeerinnineq**

Matumuuna Naalakkersuisut sinnerlugit akilaraaruserinermik ingerlatsineq pillugu Inatsisartut inatsisaata allangortinneqarneranut Inatsisartut inatsisissaatut siunnersuut saqqummiuppara.

Nunat tamat akornanni suliniaqatigiiffiit Kalaallit Nunaannut akileraartussaataitaanermut ilaatinneqannginnissaat Naalakkersuisut siunnersuutigaat. Atuutsitsinnginneq aamma sulisunut suliniaqatigiiffinni taakkunani atorfeqartunut atuutissasoq siunnersuutigineqarpoq. Siunnersuut ukiuni kingullerni Kalaallit Nunaannut annertusiartortumik soqutiginninnermik ersersitsivoq, nunatsinnilu allaffinnik pilersitsinissap annertusinera takusarparput. Tassungaa atatillugu nunani tamani sinaakkutit malinnissaat Naalakkersuisut kissaatigaat, taamaaliormi suliniaqatigiiffiit taamaattut nunallu nalinginnaasumik akileraartussaanaermut ilaatinneqartanngillat. Inatsisit taamatut atuutsinneqarnerat 2023-mut aningaasanut inatsimmi oqaasertaliinikkut ilanngunneqareerpoq. Inatsisissatut siunnersuutikkut inatsisit taamatut atuunnerat akileraartarnermut inatsimmut ilanngunniarneqarpoq.

Inatsisissatut siunnersuut aamma paasissutissanik pissarsiniarnermi aalajangersakkanik imaqarpoq. Paasissutissanik pisariaqartitsineq annertusiartorpoq, taamaammallu naatsorsueqqissaarnermik siunertaqartunut il.il. atugassatut paasissutissanik tunniussinissamik pisussaaffiliinissamut piginnaatinneqarnissamik Naalakkersuisut kissaateqarput. Siunnersuummi suliffeqarfiit akileraartarnermut ingerlatsivimmut paasissutissanik nalunaarutiginninnissamik pisussaaffeqartinneqartut, paasissutissanik akilaraarusiinermit toqqaannartumik attuumassuteqanngitsunik nalunaaruteqartarnissat ilaatinneqarpoq. Inatsisip allangortinneqarneratigut suliffeqarfiit taakku paasissutissanik akileraartutit annertussusaannik inissiinermit toqqaannartumik attuumassuteqanngitsunik nalunaarutigittussanngorsinnaapput. Piginnaatitsissut assersuutigalugu sulisitsisut ilaasa sulisorisamik agguaqatigiissillugu nalunaaquttap akunnerinik suliffigisaannik assigisaannilluunniit akilaraarutininik A-nik paasissutissanik nalunaaruteqarnermi taamaallaat atorneqarsinnaavoq. Paasissutissat taamaattut ingammik suliffeqarnermi pissutsinik misissuinerni atorneqarsinnaapput.

Allannguut annertoq alla tassaavoq aningaasarsianit akileraarutit kiisalu erngup nukinganik isumalluutitik atuinermi iluanaarutit Nunatta Karsianut nakkartarnissaasa siunnersuutigineqarnera. Aaqqissuussineq taamaattoq aatsitassarsiornermi ilisimaneqarpoq. Taamaaliornikkut akileraarutitigut isertitat taakku nammaqatigiinnikkut ataatsimut nuna tamakkerlugu pingaarnersiunermit ilanngunneqarnissaat, taamaalillunilu kommuninut erngup nukinganik innaallagissiornermut periarfissaqarnerpaanut annertunermik nakkartinneqartannginnissaat qularnaarneqarpoq.

Tamatuma saniatigut ernialiussat 100 kr.-nik taannaluunniit ataallugu annertussuseqarneranni, akileraaruserinermik ingerlatsiviup siunissami ernialiinnngissinnaanera siunniunneqarpoq. Siunnersuut taamaalilluni akileraartartunik isiginninniarlunilu peqatigisaanik aningaasat minnerusut passunneqarneranni allaffissornermi aningaasartuutitik annikinnerulersitsivoq.

Taamattaq akileraartarnermut ingerlatsivik suliamik ingerlatsinermi annertuumik kukkusoqarsimatillugu, akileraarutinit akiitsunut ernialiisarnermik unitsitsisarnermik ernialiussanilluunniit isumakkeerinninnissamut periarfissinneqarpoq. Periarfissaq taanna ullumikkut inatsisini atuutinngilaq.

Naggataatigut aningaasarsianit akileraarusiisarneq pillugu Inatsisartut inatsisaata allanngortinneqarnissaanik siunnersuummut (UKA 2023/18) malitsit, inatsisip allanngortinneqarnerata kingunerisaanik allannguinnissat inatsisillu nutarternissaa siunnersuutigineqarpoq. Ilaatigut akileraartartup maanna ukiunik tallimanik piffissaliussaasoq qaangerlugu akileraarusiinikkut amigartoorutitik kinguartitsinissamik kisaateqarnerani, akileraarutitik annertussusiliinermik nalinginnaasumik suliareqqiinissap kinguartinneqartarnissaa siunnersuutigineqarpoq.

Naggasiullugu inatsisissatut siunnersuut tassungalu nassuiaatit innersuussutigaaqka.

Taama oqaaseqarlunga matumuuna Naalakkersuisut sinnerlugit siunnersuut Inatsisartunut suliarineqartussanngortippara.